


ÅL KOMMUNE

INFORMASJON OM GRUNNSKULEN

**I dette heftet er det samla informasjon for føresette
med elevar i grunnskulen i Ål**



OPPLÆRINGSLOVA

«Opplæringa i skole og lærebedrift skal, i samarbeid og forståing med heimen, opne dører mot verda og framtida og gi elevane og lærlingane historisk og kulturell innsikt og forankring.» Slik opnar § 1 i opplæringslova. Lov om grunnskule og vidaregåande opplæring, samt tilhøyrande forskrifter er grunnleggjande for drifta av skulen. Heile lova er å finne på www.lovdata.no.

KUNNSKAPSLØFTET

Kunnskapsløftet er namnet på læreplanen for norsk skule. Den vart vedteken av Stortinget i 2006. Kunnskapsløftet fortel, gjennom ein generell del og ein fagplandel, kva elevane skal lære i norsk skule. Fagplandelen inneheld kunnskapsmål for kvart årstrinn. Dette styrer innhaldet i dei ulike faga.

BETRE LÆRING

Betre læring i Ål kommune er vår kommunale oppvekstplan. Betre læring har ein strategidel og ein handlingsdel. Betre læring har to kvalitetsmål:

1. Tett og tidleg på: Alle får raskt hjelp ved behov, både fagleg og sosialt.
2. Læringsutbytte: Med tilpassing og eigeninnsats har alle utbytterik læring.

Dokumentet Betre læring er å finne på heimesida til Ål kommune, www.aal.kommune.no.

ADMINISTRATIV TILKNYTNING

Skulane i Ål høyrer til i oppvekstsektoren. Sektorutval for kultur og oppvekst (SUKO) er det politiske utvalet. All sakshandsaming til SUKO blir førebudd ved oppvekstkontoret. Oppvekstkontoret samordnar arbeid i oppvekstsektoren og har kontor plass i Tingstugu.

FORELDRE RÅD OG ARBEIDSUTVAL FOR FORELDRE RÅD (FAU)

Foreldrerådet består av alle foreldra ved skulen. Foreldrerådet vel representantane til FAU og SU.

SAMARBEIDSUTVAL (SU)

Kvar enkelt skule har SU som det øvste organ. SU har representantar frå foreldra, dei tilsette, elevane og kommunen (politisk representant).

KOMMUNALT FORELDREUTVAL

Leiar i FAU ved skulane og i barnehagane kan kome saman i eit kommunalt foreldreutval (KFU).

NY I SKULEN

Det vil bli arrangert bli-kjent-dag for skulestartarane og eit møte for foreldre i mai – juni. Kvar enkelt skule informerer om dato og opplegg. Fyrste skuledag blir annonsert i Hallingdølen og på heimesida til kommunen tidleg i august.

SKULERUTA

Eit skuleår er 190 dagar. Skuleruta for det påfølgjande skuleåret vert kvar haust vedteke av SUKO. Vedteken skulerute er å finne på www.aal.kommune.no

SKULEBYTE

Eleva i grunnskulen har, etter opplæringslova § 8-1, rett til å gå på den skulen som ligg nærast heimen (nærskuleprinsippet). Etter grunngjeven søknad kan ein elev få byte til annan skule enn nærskulen. I slike tilfelle kan heimen bli pålagt å dekke kostnader til eventuell skuleskyss. Søknad om å få gå på annan skule enn nærskulen skal sendast til oppvekstkontoret innan 1. januar for påfølgjande skuleår.

SKULESKYSS

Etter opplæringslova har eleva på 1. årssteget rett på fri skuleskyss dersom skulevegen er over 2 km, og eleva på 2.-10. årssteg rett på fri skuleskyss når skulevegen er over 4 km.

Elevar som har særleg farleg eller vanskeleg skuleveg har rett til gratis skyss utan omsyn til veglengda. Rv 7 der det ikkje er gangveg, vert rekna som farleg skuleveg. For andre strekningar må det søkjast særskilt. Føresette må sende grunngeven søknad til oppvekstkontoret innan 1. januar for påfølgjande skuleår.

Ved flytting skal det meldast om endring av skyssbehov til skulen.

SØKNAD OM FRI/PERMISJON

For å få eit best mogeleg læringsutbytte er det viktig at eleven er på skulen. Det er ynskjeleg å ha minst mogleg fråvær.

Når det er forsvarleg kan kommunen v/ rektor, etter søknad, gje den einskilde elev permisjon i inntil ti skuledagar. Det er eit vilkår at foreldra sørger for nødvendig undervisning i permisjonstida, slik at eleven kan følgje den allmenne undervisninga etter at permisjonstida er ute, jf. opplæringslova § 2-11.

Dersom det er ynskje frå foreldre om fri meir enn ti skuledagar, må det det sendast grunngeven søknad til oppvekstkontoret i kommunen. Ved fråvær på meir enn ti skuledagar, vert eleven skrive ut frå skulen og foreldre overtek opplæringsansvaret.

MÅLFORM

Opplæringsmålet i Ål kommune er nynorsk. All informasjon som blir sendt frå skulane er på nynorsk.

Dersom det er ynskje om bokmål som opplæringsmål, må føresette sende grunngeven søknad til oppvekstkontoret innan 1. mars for påfølgjande år. Dersom fleire enn ti elevar på eitt trinn i kommunen ynskjer bokmål, kan desse bli samla i ein eigen klasse ved ein av skulane i kommunen.

MEDISINERING

Dersom eleven grunna allergi eller andre tilhøve treng medisiner i skuletida, må det gjerast skriftlege avtalar med skulen om dette. Skulen gjev nærare informasjon om slike avtalar.

KOST

Sunn og god mat er viktig for godt læringsutbytte og skulane i Ål fylgjer «Nasjonale retningslinjer for mat og måltid». Det er viktig at elevane et god frukost heime og har med seg matpakke. Mjølke eller annan drikke kan bestillast etter avtale.

TEIEPLIKT OG POLITIATTEST

Alle som arbeider i skulane har teieplikt etter § 13 i Forvaltningslova. Dette gjeld også ev studentar, hospitantar og lærlingar som har ein form for praksis i skulen.

Alle som arbeider i skulane har levert politiattest i samsvar med Opplæringslova § 10-9.

TVERRFAGLEG TEAM OG HJELPEINSTANSAR

Tverrfagleg team har ein rådgevande og rettleiande funksjon. Føremålet er tidleg innsats og å gje fagleg støtte så tidleg som mogleg. Tverrfagleg møte skal vere eit lågterskeltilbod til barnehage, skule og føresette.

Tverrfagleg team er sett saman av kontaktpersonar frå pedagogisk-psykologisk teneste (PPT), helsestasjonen, psykisk helse og barnevern, saman med representantar frå den einskilde skule. Representant frå barneverntenesta deltek fast i fyrste møte og elles ved innkalling. Føresette som ynskjer hjelp i tverrfagleg møte, kan ta kontakt med eigen barnehage eller skule.

ENDRING AV NAMN OG ADRESSE

Det er viktig at skulen er oppdatert med rett namn, adresse, e-postadresse og telefonnummer til elev og foreldre. Skulen kan ha behov for å nå foreldre raskt. Ved flytting og endring av namn, telefonnummer og e-postadresse pliktar føresette å sende melding til skulen snarast. Adresseendring skal også meldast til Folkeregisteret.

Dersom flytting fører til at eleven får annan nærskule, skal eleven byte skule.

SFO

Skulefritidsordninga (SFO) skal vere eit tilbod før og etter skuletid for elevar på 1. - 4. trinn og for barn med spesielle behov på 1. - 7. trinn. SFO skal vere ein trygg stad for barna å vere utover skuletida, gje barna omsorg og tilsyn, samt leggje til rett for leik, kultur- og fritidsaktivitetar.

Søknadsfrist for hovudopptaket til SFO er 1. mars. Innmelding skal skje på elektronisk skjema som er å finne på www.aal.kommune.no

LEKSEHJELP

Kommunen har tilbod om frivillig og gratis leksehjelp for elevar på 3. – 10. årstrinn. Formålet er å gi støtte til læringsarbeidet og gode rammer for sjølvstendig arbeid. Kvar einskild skule organiserer påmelding og gjennomføring av leksehjelptilbodet.

FYSISK FORSTRING OG FYSAK I FAG

Fysisk fostring er eit av satsingsområda i "Betre læring." Frå og med skuleåret 2015/2016 er det innført eit eige fag på barnetrinnet; fysak i fag. Det nye faget skal sikre 1 ½ time med fysisk aktivitet kvar veke i timeplanfesta tid i tillegg til kroppsøving. Faget får i sum 399 timar fordelt på sju trinn. I det nye faget blir fysisk aktivitet teke i bruk som pedagogisk metode. Aktiviteten skal vere knytt til innøving av basiskunnskap i teorifag. Intensiteten skal vere frå moderat til høg. Faget skal vere synleg i timeplanen til alle barneskulane i Ål, men skulane avgjer sjølve organisering og plassering.

DEN KULTURELLE SKULESEKKEN

Den kulturelle skulesekken er ei nasjonal satsing som skal bidra til at elevar får høve til å møte profesjonell kunst og kultur av ulike slag. I tillegg til at Buskerud fylkeskommune har ein strategiplan for Den Kulturelle Skulesekken (DKS), vedtek Ål kommune kvart fjerde år ein lokal DKS-plan.

FRITAK FRÅ SKULEARRANGEMENT I KYRKJA

Utdanningsdirektoratet har presisert at skulen kan gjennomføre gudstenester som ein del av den generelle kultur- og tradisjonsformidlinga, men gudsteneste kan ikkje vere ein del av RLE- faget.

Foreldra kan ved skulestart gi melding om fritak frå skulearrangement i kyrkja på generelt grunnlag. Skulane pliktar å sende info til heimane om innhald i sine arrangement. Dersom foreldra seinare i skuleløpet endrar syn på dette, må skulen få melding om dette.

*Har du spørsmål? Ta kontakt med skulen eller oppvekstkontoret.
Sjå også www.aal.kommune.no for meir informasjon.*

VEL MØTT TIL SKULEN I ÅL